



**KARARAG A PANANGIDATON  
ITI DI-NATULAWAN A PUSO NI MARIA  
*Basilica ni San Pedro*  
25 Marso 2022**

O Maria, Ina ti Dios ken Inami, kumamangkami kenka iti daytoy a tiempo ti pannakasuot. Ay-ayaten ken am-ammonakami gapu ta sika ti Inami ket ammom dagiti pakaseknanmi. Ina ti kaasi, adun dagiti padasmi iti nainaan a panangaywan ken panangtaripatom kadakami nga annakmo! Saanka pulos nga agsardeng a mangiturturong kadakami ken Jesus, ti Prinsip ti Kappia.

Naiwawakami iti dayta a dalan ti kappia. Nalipatanmi dagiti naipaay a sursuro dagiti didigra iti napalabas a siglo, ti sakrifisio dagiti riniwriw-riw a napasag iti daydi dua a nainlubongan a gubat. Inumsimi dagiti inlagakmi a sapata a kas gimong dagiti pagilian. Tinallikodanmi dagidi arapaap a kappia ken namnama dagiti tattao. Naigamerkami iti kinaagum, ti laeng bukodmi a pagilian ken pagimbagan ti pinampanunotmi, timmanorkami nga awanan bibiang ket nasamaykami iti kinamanagimbu-bukod kadagiti kasapulan ken pakaseknanmi. Pinilimi a lipaten ti Dios, napnekkami kadagiti panagam-ammangaw, dimmakkelkami a napalangguad ken mannaki-apa, ti panangparit ti panagdur-as ti biag dagiti nanumo ken agurnong ti armas. Nagsarimaddengkami a mangtaripato kadagiti kaarrubami ken mangtagiben ti pagraramanan a pagtaenganmi. Rinanggasanmi ti minuyongan ti lubong iti gubat ken kadagiti basolmi a nangrumek ti puso ti nailangitan nga Amami, nga isu, pagayatanna a dakami ket agkakabsat. Timmanorkami nga awanan bibiang iti amin kalaksidan dagiti bagbagimi. Ita, iti bainmi isangitmi: Pakawanennakami Apo!

Nasantoan nga Ina, iti baet ti leddaang ti kinamanagbasolmi, dagiti pakarigatan ken kinakapoymi, ti misterio ti basol nga isu ti dakes ken gubat, ipalagipmo kadakami a dinakamto pulos tallikudan ti Dios, ngem itultuloyna ti panagayatna kadakami, sisasagana a mamakawan ken mangibangon kadakami iti baro a biag. Impaaynaka kadakami ket inaramidna a ti Di-Natulawan a Pusom agbalin a taklin ti Iglesia ken ti amin a sangkataoan. Iti pananginakem ti Dios, addaka a kanayon kadakami; uray iti baet ti riribuk ken pakasikuran ti pakasaritaanmi, addaka latta a sia-ayat a mangbay-bayabay kadakami.

Kumamangkami kenka ket agtugtogkami ita ruangan ta pusom. Dakami dagiti dungdungoem nga annak. Iti tunggal panawen, impaka-ammom ta bagbagim kadakami, ket aw-awisennakami nga agbalbaliw. Iti daytoy nasipnget a tiempo, tulongannakami ken ipaaymo kadakami ta pannaranaymo. Kunaem kad man kadakamin: “Awanak kadi ditoy, Siak nga Inayo?” Kabaalam a warwaren dagiti galut kadagiti puso ken iti panawenmi. Mangnamnamakami kenka. Natalgedkami nga iti daytoy a tiempo ti pannakasuot, denggem dagiti asugmi ket tulongannakami.

Sadiay Cana iti Galilea, nagdawatka ken Jesus ket inaramidna ‘tay immuna kadagiti milagrona. Tapno mataginayon ti ragragsak daydi kasar, kinonam kenkuana: “Naibusandan iti arak” (Jn 2:3). Ita, O Ina, surnadam kad dagidi balikas ken dawatmo, gapu ta iti daytoy a tiempomi naibusankamin iti arak ti namnama, napuyupoy ti rag-o, napukaw ti panagkakabsat. Nalipatanmi ti kinataomi ken binusbosmi ti sagut ti kappia. Inlukatmi dagiti pusomi iti kinarungsut ken kinaranggas. Kasapulanmi ita ta nainaan a pannulongmo!

Isu’t gapuna, O Ina, denggem ti kararagmi.  
Bituen ti Taaw, dinakam baybay-an a marba iti kinadawel ti gubat.  
Lakasa ti Baro a Tulag, ipaltiingmo dagiti ganuat ken dana ti panagkakappia.  
Reyna ti Langit, ipulangmo ti kappia ti Dios iti lubong.

Pukawem ti gurang-gura ken pannakawaw iti panagibales, ket sursuroannakami a mamakawan.

Ruk-atannakami iti gubat, salaknibam ti lubongmi iti makadangran nga armas a nuklear.

Reyna ti Nasantoan a Rosario, ipaamirismo kadakami a kasasapulmi ti agkararag ken agayat.

Reyna ti Sangkataoan a Pamilya, ipakitam kadagiti tattao ti dana ti panagakabsat.

Reyna ti Kappia, gun-odem ti kappia iti lubong.

O Ina, tignayem kad' dagiti natangkenan a pusomi ita naladingit a panagdawatmo. Dagita kadi arubos ti luam pabaroenna ti tanap ti gurang-gura. Iti baet ti gorrood dagiti igam, ti kararagmo iturongna koma dagiti isipmi iti kappia. Ti koma nainaan a pannaranaymo bang-aranna dagiti agsagsagaba ken dagiti nagtalaw gapu kadagiti panagbettak dagiti bomba. Ti koma nainaan nga arakupmo paregtaenna dagiti napilitan a mangpanaw kadagiti pagtaengan ken pagilianda. Ta koma Naladingit a Pusom guyuguyennakami a mangngaasi ket paltiingannakami a mangilokat kadagiti ruanganmi ken mangsalimetmet kadagiti kakabsatmi a nadangran ken napadisi.

Nasantoan nga Ina ti Dios, idi nakitanaka ni Jesus ken ti adalan a dinungdongngona iti sakaan ti Krus, kinunana kenka nga inana: "Babai, adtoy ti anakmo" (Jn 19:26). Iti daytoy a wagas, intaleknakam kenka. Kinunana met iti adalan ken kadakami: "Adtoy ti Inam" (v. 27). Maria nga Inami, pagayatanmi a pasangbayendaka iti biag ken pakasaritaanmi. Iti daytoy nga oras, makipagtakder iti sakaan ti krus ti nabannog ken agtutuok a kinataomi, isu a makasapul ti inkam panangitalek daytoy a kinataomi kenka ken babaen met laeng kenka, idatonmi daytoy a kinataomi ken Kristo. Dagiti tattao ti Ukraine ken Russia, isuda nga agruem kenka iti napalaos nga ayat, kumamangda kenka, ta sumnek met ti asim kadakuada ken kadagiti amin a tattao a biktima ti gubat, bisin, inhustisia ken kinapanglaw.

Ngarud, O Ina ti Dios ken Inami, ita Di-Natulawan a Pusom agkammatalekkami ket idatonmi ti bagbagimi, ti Iglesia ken ti sangkataoan, nangnangruna ti Russia ken Ukraine. Awatem kad daytoy a gapoanan ken aramid a napnoan ti inanama ken ayat. Ipaaymo kadi ti panaggibos ti gubat ken ti pannakairakurak ti kappia iti sangalubongan. Daydi "Fiat" a nagtaud ita pusom inlukatna dagiti ruangan ti pakasaritaanmi iti Prinsipe ti Kappia. Agtalekkami a babaen ta pusom, ti kappia umapay manen. Kenka idatonmi ti masakbayan ti sibubukel a sangkataoan, dagiti kasapulan ken sangit ti tunggal maysa, dagiti pulkok ken namnama ti sangalubongan.

Babaen iti panangibabaetmo, sapay koma ta ti kaasi ti Dios maibukbok iti lubong ken ti nasadia a kappia maisubli kadagiti aldawmi. Nuestra Señora ti "Fiat", immulog kenka ti Espiritu Santo, isublim kadakami ti timpuyog nga agtaud iti Dios. Sapay koma ta sika a "sibibiag nga ubbog ti namnama", sibugam ti namaga a pusomi. Ita tianmo nagbalin a tao ni Jesus; tulongannakami a mangitandudo ti pannakapatanor ti panagririnnanod. Nagdaliasatka met ditoy lubong; iturongnakam kadi iti dana ti kappia. Amen.